

祭文

吳佩孚祭文

維

民國十有七年戊辰六月朔戊午越己丑日壬子勳一位孚威上將軍吳佩孚命前秘書處長楊圻謹以少牢之奠代表致祭於

兩公元帥仁弟之靈曰嗚呼天下滔滔亂民接踵東北義旗一隅猶重公之一身國之樑棟聞公之亡臨江長慟非公之惜惟國是痛軼里無名博浪竟中始聞而疑今騰於眾嗚呼哀哉自與公交寒暑兩經以事變之紛擾致肝膽以莫傾恐瞑目而長往或遺恨於九京爰饋奠以致辭而告慰夫

英靈嗚呼哀哉壬戌之戰於公何仇踴躍用兵於我何求

公既入關而弗我讐風高廉藺遣使岳州澄清相勗意氣相酬申以兄弟同心綢繆登壇歃血撥亂橫流既見君子共茲戚休會師畿輔自夏徂秋

南海夕烽達乎巴邱乃眷西顧破釜沉舟江南諸軍投壺優遊方舟鼓噪而趨石頭弗寇之禦而我是謀螳螂之智冀豆之羞非戰之罪人心之憂糜爛江表於敵何尤佩乃移師郟鄏號汰老去弱秣馬厲兵告乎河朔西封崤函東規湘鄂我馬首以欲東顧關西之元惡懼虎兇之出柙防死灰之復作故遲遲其我行復坐鎮乎河洛

公則欲以朔方之兵規復江左假道中原急如星火僕病未能

公獨負荷雖實獲乎我心而不知其不可苟救國其有人亦何必其自我時則豺狼東下深入江淮孤軍萬里兵法是乖我開關以要擊實旦夕而可恢憤我悍將擁兵徘徊非偷安而玩寇懷異圖而禍胎於是縱敵長驅妖星如雨蠶食鯨吞從容莫禦淪文物於荆榛竭東南之財賦嗟裂冠而毀冕竟血流以漂杵

公之起而代謀蓋以持之有故計國步於私交又奚嫌乎越俎公急國難我豈私怒公弗我欺我則公恕

公今長往余懷誰語嗚呼哀哉至若強鄰耽耽虎視遼東廟堂禍國公獨折衝最惠條件十不一容

公弗媚外殃及厥躬是爲愛國雖死猶雄邪說橫行道德淪喪濁亂綱紀焚殺是尙

公獨討赤當仁不讓是爲義師雖敗猶壯綜斯二者義正意堅眾醉獨醒弗惑弗遷此我之志亦

公之肩誰歟同心敢曰兩賢而今而後宇宙腥羶河山舉目吾道孤焉嗚呼哀哉長城高高遼海茫茫欲往從之蜀道阻長斷我手足壞國金湯風騷騷而巫峽月暗暗而瞿塘聞鶉啼而下淚聆清猿而斷腸弔陣圖於魚復問白帝於荒江緬共濟之吳蜀傷無命於關張嗚呼哀哉噫嘻

雨亭雨亭永訣生平一晤成古長別此生象賢繼體望諸漢卿後死之責我豈忘情清江萬里濁酒遙傾用因風以披瀝不知夫涕淚之縱橫嗚呼哀哉尙

饗

楊圻祭文

維

民國十有七年歲次戊辰六月朔戊午越己丑日壬子一等文虎章二等嘉禾章國務院存記簡任職三四方面軍團部參議楊圻敬以清酌庶饌之奠致祭於

大元帥張公之靈曰嗚呼邦國不造戰危兵凶功虧九仞馬首遂東天不助順喪我元戎太白明晝遼雲暗空嗚呼哀哉今天下之大患不在三民而在共產不在餘子而在元兇是故我

公討赤者也孚威亦討赤大義不孤道合志同義旗所指握手兩雄方謂左提右挈天下不足平而觀厥成功也不幸曩者孚威以討赤兵敗洛中今不幸而

公亦以討赤而喪厥躬嗚呼哀哉圻於我公之捐軀而嘆討赤之無繼愴

國難於靡窮於是追感前事傷懷今茲而推測其終蓋有爲我公痛惜者
二敬服驚嘆者四爲中國痛哭者三爲南軍太息者一用以昭告於我
公夫東三省風氣淳樸沃野神皋寶藏豐殖人民富豪有山海之利有五
穀之饒天險四塞侔乎虎牢九泥可封比乎函嶠此所謂天府之國也公
受得土之祚在丁戌之交政由己出不請於朝此十餘年者誠能與遠識
之士共圖大業不求近功閉關自韜旣繕旣飭觀變屏囂以靜制動以逸
待勞教養生息以至今朝則財不可勝用也兵不可勝戰也富強堅固安
土樂郊席豐處厚則過乎元清因利乘勢則邁乎金遼此又所謂天驕之
資也然後挾其天時地利而修德求賢人和以昭乘天下之弊而持群雄
之後引弓不發驚猿羣號將見一怒而諸侯懼安居而天下息天下豪傑
有不款關納陞而兼容并包者哉方今群龍無首橫流滔滔以力以德何
事而不可爲此霸王之業也中國之福也惜乎公之以未聞遠謀急功近
名入關而自畫也是有壬戌之戰有甲子之戰有丙寅之戰有丁卯之戰

於是乎有今茲之動搖固亦一發不收相因而至者矣夫兵危事也敗固大損勝亦自戕輪臺罪已寧非開疆不戢自焚而元氣以傷綜其利害則得失不償論乎根本則失機亡羊雖曰天命之有待或亦人謀之未盡臧此爲我

公痛惜者一也嗚呼哀哉及夫慷慨誓師建旗討賊正義獨持久而弗輟今中國惟

公一人而已四海之內與

公同志軍可敗身可殺而志不可奪能與我

公同德同心共茲休戚以匡國家以救饑溺亦惟孚威一人而已不幸孚威南陽兵敗西蜀匿跡致唇亡而齒寒欲助

公而無力此天下之不幸而南軍之大幸也設令孚威坐鎮兩閭至今守土掌北方之管鑰捍中原之門戶刁斗相聞守望相助則南軍敢彎弓而北向窺潼關而耀武晉豫京漢之間何勞

公之顧慮卽或去歲秋冬義旗再舉荆蜀上游整其師旅駛建瓴之方舟
鳴東行之笳鼓則吳之南軍將陳師於江潯方自救之不遑且狼顧乎齊
魯是津浦淮濟之川原何覩乎北伐之狼虎是今日者

公正廣廈優游清風揮羽何由而兵敗神京喪軀炎暑哉德必有鄰曲高
無與一子未安全盤盡誤此可爲

公痛惜者二也嗚呼哀哉當夫孚威旣敗討赤正義屬望遼東撥亂扶危
所賴我

公東南有識之士身受剝膚之凶盡室北徙天下喁喁無不太息孚威之
撓敗而望

公之成此亦圻北來觀成之初衷也乃前者以孚威之敗而
公勢以孤今又以

公之亡而孚威勢窮大義云亡憤盈蒼穹狂流泛亂憂來填胸神營九塞
稅駕何踪彼南軍亦奚暇夫討赤方自殺而相攻其政治將由此而叢脞

兵力由此而弗容黨勢由此而裂利爭由此而訐逆計受其禍者首爲某某之入樊籠斷腕何及嚙臍無從自貽其戚烏盡藏弓赤化乘之亂不旋踵此可爲中國痛哭者二也嗚呼哀哉夫事固有絕不相謀而交相資用者矣南北雖敵鬩牆以爭而討赤之旨乃不約而同情一年以來北方猶得安枕者固由乎我軍之防範亦利乎南方清黨之先聲赤苟猖獗自不難攜手而急其所急互爲長城今者南方以我敗而徼倖成名亦將以我敗而孤掌難鳴一旦緩急欲求一有力之臂助謀眾舉而共擎以禦外侮以遏亂萌蓋不可復得矣夫群雄割據力侔勢紛非可驟并而盡吞也能擇善以厚用而遠交焉而近攻焉或勢莫能兩立或利在乎並存此諸葛公所以晚年北伐之師不憚六出而當建安中葉之際但言三分夫以天下之大欲以一黨自居不度德而量力捨康莊而窮途彼徒斤斤乎一旗幟一主義之微昧實禍而務其虛不知北交反北伐以自孤不知存奉甘赤化之前驅計至左矣其能久乎故北伐之竟驅雀驅魚是蓋赤黨之福

而實某某之愚此因

公之敗而爲西南嘆息者一也嗚呼哀哉夫至南軍旣敗而赤化以起必騷亂而無成非蘇俄之可比起而代謀者持之有故利害相關者言之成理時則率土之濱流離瑣尾或將雲霓夫外軍求飲酖而救死唐借回紇之兵以靖安史明有三桂之請以平張李後之視今亦猶今之視昔彼哉南軍實爲禍始事雖未來勢必然矣此又因

公之敗而爲中國痛哭者三也嗚呼哀哉然而

公以異軍崛起遼陽威名遠播懾彼鄰邦武如張吳文用袁王百廢俱興名實彰彰得賢而理知人則昌臥榻之側雲譎波狂勞我折衝窮彼譁張交鄰外和禦侮內剛故終

公之世弗撓弗傷非才雄義正愛國愛鄉能如此哉

公自壬戌之敗臥薪自警亦自能軍歸保己境翻然改圖去其痼病大創之餘人心以卽定其知短而取長實一念之反省勾踐中興人所難能者

矣榆關之役直奉爲讐而

公入關遣使岳州敬孚威之忠正慰三師之保留數謙辭以交歡申昆弟之綢繆不戰勝而自狃共謀國而忘仇其宏量與遠識實曠代而寡儔此圻所以稱

公英雄而力勸孚威釋怨以共心腹結盟而挽洪流者也及乎松齡之變班師蘆灤堅甲十萬及乎榆關大敵當前外無一援蕭牆之禍三軍膽寒千鈞一髮危而轉安魯陽揮戈全軍解鞍非恩義素浹紀綱獨完能臻此哉綜此四端是公之識量才略豈當世群倫所得而並論此圻所以敬服驚嘆者矣人之云亡邦國殄瘁嗚呼哀哉噫嘻博浪一擊遺恨蕭蕭功思僕射名勒嫖姚鷹臺旗靜黑水星高風趨甲馬月冷大刀江聲山色餘氣未消三軍雨泣哀歌大招瞻素車兮白馬如來去乎靈濤華表依然遼東化鶴魂兮歸來故鄉城郭海雨夏寒邊星曉落日暗轅門雲平萬幕部曲淒涼哀流清角嗚呼哀哉遼水湯湯長城茫茫短歌一曲雄風激揚緬英

名於異代能並世而弗傷爰陳辭以攄懷其來格而來嘗嗚呼哀哉尙饗

馬澤民等祭文

維

中華民國十七年七月八日馬澤民張廷一何振東王化興周琨劉中興解如川孫銘久王保純白茂權龔震宇潘賡舜熊佐華劉玉璋姜兆渭林馥王維祺楊舒紳等謹備清酒庶饘薦以少牢之禮敬致祭於

大元帥張公之靈曰嗚呼我

公鍾兩間奇淑之氣作中華特出之英懷秦皇漢武之雄略有完顏耶律之威名奠定中原雖未得遂其壯志罷兵息爭乃深憫惻夫生靈彼蒼蒼者天何以降此鞠凶泰山頽兮梁木壞萬民哀悼其無依兮而後生學子又安仰其景行願我

公陟降於上帝左右兮庶祈庇佑夫蒼生奉觴布奠聊申愚誠尙

饗

京奉路各站監察員祭文

維

中華民國十七年七月八日前京奉鐵路各站監察員 金德恩等謹以清醪庶羞之儀致祭於

張大元帥之靈曰嗚呼白山皚皚黑水湯湯誕生睿哲偉略發皇巍乎莫名大造邦鄉義旗西指我武維揚肅清妖孽奠定中央正位

元首庶事咸康卿雲燦目萬國顒望統一華夏泰運方昌胡天不弔北極韜光萬民哀悼舉國如喪德恩等猥荷甄培仰戴秋陽勗勉佐治俾資弼匡感恩圖報矢激衷腸孰意願望空存今頓渺周行撫今追昔兮泣霑胸而浪浪想英靈不泯兮

佑吾民於大荒瞻刀弓之欲動兮

神其來格來享嗚呼哀哉伏維尙

饗

金德恩等祭文

維

中華民國十七年七月二十五日前京奉路各站監察員金德恩等謹以清醴素饗之奠致祭於

大元帥之靈前曰嗚呼天未悔禍喪亂靡已莽莽黃輿伊於胡底伏維叡哲應運特起雷精稟氣電樞毓美河鼓一星風威萬里外禦強侮內除姦宄功彌六合江空一葦志澄中原神遊粉里嗚呼哀哉緬懷丕績千古遐超經文奮武總制全遼襁負絡繹千里匪遙夏日愛戴秋馬嘶驕貪狼斂角甌脫煙消遺民未改泣感垂髫嗚呼哀哉赤氣不掃遍及中土勢甚洪水害逾猛虎惻彼倒懸爰繕我旅列騎淮流陳師江浦五嶺謳歌兩階干羽戰勝弗居德超崇古精可薄天暗遭伏弩嗚呼哀哉赤賊不除國運靡臧詖辭譎眾爲虎作倀一人作慝舉國如狂犁庭掃穴我武維揚鯨鯢就

殲日月韜光滄海橫流蒼生何望嗚呼哀哉浩氣常存英靈不爽大義終伸氛消月朗一朝遺恨千秋震響道濟生民智周彼黨反側革心有時稽顙願錫福於編氓永興歌於擊壤嗚呼哀哉德恩等仰承甄拔渥被培栽勛以佐治期以達才拔茅茹於幽谷植屈軼於春臺被轅駒以六轡控逸足於八垓感恩淪骨効命不回怨赤烏兮夾日痛黃熊兮爲災覩三辰而隱耀同七萃以騰哀冀弓刀之歆動眷故國而神來嗚呼哀哉伏維尙饗

金德恩等祭文

維

著雍執徐之歲己未之月丙子之辰前京奉路全體監察員金德恩等謹以玄酒少牢之奠致祭於

海陸軍大元帥之靈曰嗚呼有清季葉天誕豪雄龍拏虎擲於遼之東風雲澎湃國勢沸騰戈揮渤碣電掃欃槍雷霆霹靂海宇清澄嶽嶽我公柳

塞長城溯自辛亥義旗初揭武漢一呼乾坤傾圻鼙鼓淵淵旌麾獵獵宏
濟茲艱伊誰舟楫厥維我公震震曄曄挈此金甌獨標偉烈渤海屏藩遼
東鎖鑰爰逮庚申日月滋昏安福禍國大難浹臻京圻岌岌熊罴踴躍保
大師起萬馬雲屯我公赫怒誓翦妖氛暗鳴山岳叱咤風雲北倉一役奠
枕天津邊軍解甲當者其奔嗟我公力旋乾轉坤丙寅履歲赤禍颺熾蔓
延神州粘天匝地素墜網常隳滅倫紀磨牙吮爪長蛇封豕我公心惻汪
然出涕爰整師旅盪彼魑魅赤燄烟消白宮日麗懿哉我公獨肩匡濟粵
歲戊辰狼虎負嵎踞我堂奧剝我肌膚鄒魯膠濟悉屬刀俎烽連泰岱血
漾明湖哀我黎庶慘遭剝屠我公崛起倚劒天衢弭兵通電共滌奇汙合
衷濟阨退歸枌榆長途迢遞寇張之弧麾纛蒞郭突罹鬼戾白山頽隕黑
水咽嗚嗚呼哀哉傷也何如伏維尙

饗

苗松培祭文

維

中華民國十七年七月八日陸軍第二七方面聯合軍團參謀長苗松培等謹以清酒庶羞致祭於

先大元帥張公之靈曰嗚呼茫茫大地蚩蚩無歸統馭撫育端賴英偉惟我

元首羣倫共推卹民靖難以奠邦國中樞總持咸欽齒德勛垂遼海謀嫺豐沛嵩嶽分靈元黃毓粹詎天佑赤月犯紫微禹甸未安泰山先頽民失所瞻已覺心悲矧屬部下久隸旌麾頓喪典型益深慟惻嗚呼痛哉泉臺空憶岐路興悲遺訓昭然誓死不背隕涕陳辭冀

神式格伏維尙

饗

齊恩銘等祭文

維